



partii naleraq

UPA2016/67

Nunatsinni erngup nukinga atorlugu pilersuinissamut kiisalu avammut niueruteqarnissamut periarfissat unammilligassallu erngup nukinganik nukissiuuteqarfiusuni piukkunnaatilinnilu Naalakkersuisut nalunaarusiornissamut peqquneqarnissaannik Inatsisartut aalajangiiffigisassaattut siunnersuut. Nalunaarusiami erngup nukinganik nukissiorfinnik pilersitsinissamut aningaasalersuinissaq kiisalu tamatumunnga periarfissat ilaatinneqassapput. Nalunaarusiaq kingsinnerpaamik inatsisartunut UKA2017-imi saqqummiunneqassaaq.

(Inatsisartunut ilaasortaq Anthon Frederiksen, Partii Naleraq)

Atorluaanerup iluatsinnerpaaffiunissaa qanoq ittuusinnaaneranik siunnersuuteqartoq Anthon Frederiksen, Partii Naleraq, erngup nukianik nunatta avataanut tunisassiulernissamik siunnersuuteqarneranik qujaffigerusupparput.

Ilumoorpormi misissuinerpassuit amerlasuut akisuullu Amitsuarsuit tasersuanut tunngasut qularnangittumik pigineqareerput, soorlu ilisimaneqartoq nunavissuaq nunatta kitaatungaaniittoq annertusiartuinnartumik nukimmik mingutitsinngitsumik pisariaqartitsisoq. Soorlutaaq aamma illersornissamut isumaqatigiissutip nutarternissaa aamma eqqartulereereripput, tamakkulu ilanngullugit aammalu naassaangiusartumik imermik mingoqanngittumik peqarnerput ilanngullugu isumaqatigiinniarnermi qitiutinnissaat Naalakkersuisunut sakkortuumik kaammattuutigerusuppagut. Taama aallarniuteqarluta immikkoortoq 67 erngup nukinganik tunisassiulernissamik pilersitsinissamik siunertalik oqaaseqarfigissuarput.

Qaavatiqullu aamma ilisimavarput ukiup nikinnerani Paris-imi COP 21 atsioqatigiinnertalimmik naammassineqarpoq nunarsuarmioqatigiinnut pisussaaffiliisumik, taamaattumik tunngavissaqarluarpugut, nammineq nunatsinni nukimmik mingutitsinngittumik annertusaanitta saniatigut avammut tunisassiarineqarsinnaanerani misissuinissatsinnut. Alcoa, nunatsinnut iluaqutaasussaangitsoq pisortatigoortumik unitseriarlugu aningaasarpasuit pilersaarummut atornikuusagut ugguuna siunnersuutikkut iluaqutissanngortinnissaat aqutissiuunniartigu, assortuuffisariaqanngilarluunniit, taamaattumik partiit tamaasa iluatitsinissamut qaaquagut, suliaq aallartinniarli, iluatitsinngortsoorneq iluatitsininngortinniartigu. Suliaqqinnermilu aamma ilanngullugu erngup nukiliorfiini imeq nukilerioreernerup kingorna avammut kuutsiinnarneqartartup aamma tunisassiarineqarsinnaanerata misissornissaa ilanngullugu kaammattuutigarput. Tassami tungitsinniit eqqaariikkatsituut –

Naalagaaffiit Peqatigiit (United Nations) arlalinnik nalunaarusiaqarpoq nunarsuarmi inuit amerliartuinnarnerat ilutigalugu, aammalu mingutitsinerup kingunerisaanik, imermik pisariaqartitsilluinnartut. 2012-mi nalunaarusiaq malillugu imermik 2012-mi mingoqanngittumik/minguujakkamik pisariaqartitsisut 800 miliuuningajaasut, siornalu 2015-mi 600 miliuunit sinnersimassagaat, kisitsilli taanna angineruvoq. Nalunaarusiap allap siulittuutigaa ukioq 2025-mi, tassa ukiut 9-nginnaat massakkumiit qaangiuppata nunarsuarmi inuit 1.8 miliartit imissaaleqinermik eqqugaasimassasut. Ernumanaqaaq tamakku atuarlugit, taamaattumik nunatsinni iliuuseqarnissatsinnik pisussaaffimmik annertuupilussuarmik peqarpugut isiginngitsuusaarsinnaangisatsinnik, pilersaarusiorlutalu aallartittariaqarnitsinnik aamma tikkuussisunik.

Pisuussutigut assiginngitsut eqqartoqartaarpagut, ilai isumaqataaffigalugit ilaalli aamma isumaqatigiinngiffigalugit, qularnanngilarli una pisuussuterput tamatta

isumaqatigiissutigisinnaassuarput, iluaqutigisinnaagatsigu pinngortitatsinnut ajoqusiinertaqanngitsumik, aammalu nunarsuarmioqatitta pisariaqartilluinnagaanik. 2004-mi imeq sermerlu pillugit inatsisiliorpugut, taannalu uagut tungitsinniit kinguarsaqqinnagu naleqqussartariaqaleripput isumaqarpugut.

Makku qularnaapput:

nunarsuarmioqatitsinnit pisariaqartinneqavippoq,

pisuussutigaarput,

mingunneqanngitsumik nunanut allanut tunisassiarisinnaavarput, nunarsuarmi ajornerulernermik isigineqaatigilernaviangilarput.

Pisuussutit tassaasarput, inunnik pisariaqartinneqartut, naleqartut.

Taama oqaaseqarluta siunnersuut tamakkiisumik taperserparput, inuussutissarsiornermillu ataatsimiititaliamut aammalu nunanut allanut sillimaniarnermullu ataatsimiititaliamut suliaq ingerlateqqillugu

Qujanaq